

letere dil provedador Griti e dil Governador, in soa recomandatione, laudando molto le operation sue, *etiam* perchè non fu in dolo. Ozi fo assolto che 'l possi esser a nostri stipendii. Questo ave per moglie una fia dil conte Hugo di San Severin, chiamato Pandin, dil qual era conte, et uno so' fradelo ha l'altra sorela; et la moglie di questo conte Alexandro è morta. Hora el re di Franza li à tolto Pandino.

Fu presa una parte: che li Cassieri debbano saldar le casse ogni mexe, zorni 8 poi compite il mexe, soto grandissime pene *ut in parte*. La qual si publicherà in Gran Consejo.

Fu preso una parte: che li debitori dil dazio dil vin, che sono zereha ducati 7000 nuovi, debano in termene de zorni . . . aver pagato quanto dieno dar, soto pena di altratanto, et *de cætero* non si possi più far debitori, excepto li burchi e magazeni ne le barche siano licentià, ne' altri navili dil dazio, si non harano pagato, soto pena di altratanto etc. Con altre clausule *ut in parte*, la qual sarà publicata.

Fu tajata certa sententia fata per li Patroni di l'Arsenal presenti contra il conte di Prata di Friul per roveri taiadi, quali erano di l'Arsenal, et reduta in gratia di ducati 500, zoè 400 a la Signoria et 100 a li Patroni prediti, e i legnami sia di la Caja; la qual cosa fu fata cussi, esso volendo, per esser expedito.

È da saper: in questo mese andato fuora sier Michiel Malipiero patron a l'Arsenal, trovoe forsi 100 roveri grossi posti sotto terra per li frati di San Zorzi a l'abazia di Mozo, et fati cavar, fono mandati a la caja de l'Arsenal.

Fono sopra certa sententia fata per li Provedadori sopra le Camere, intervenendo la comunità di la Meduna.

147 *Di campo, dil provedador Griti, da Villafranca, di 27.* Zerca danari voleno li thesorieri francesi. Dicono dover aver per conto vechio ducati 5000, et per questa paga, compie a di 4 Decembrio, ducati 16 mila et più *ut in litteris*. Et scrive sopra queste materie.

*Di Franza, di l'Orator nostro, di 20, di Ambosa, ut in eis.* Il sumario di le qual scriverò di soto, lete le saranno in Pregadi.

*A di 30.* Fo Santo Andrea. Domenega. Fo gran vento, et non fo letere la matina di campo, *solum* di rectori di Padoa, zereha aque far condur atorno la terra in certe fabriche nove *ut in litteris*, et solieita si rispondi quello hanno a far.

*I Diarii di M. SANUTO. — Tom. XXIII.*

Da poi disnar, fo Gran Consejo, et fu posto per li Consieri: atento il guardian e compagni di la Scuola di San Roco habino fato certo principio di fabrica per la Scuola, che li sia dato una galia vechia, con questo la cavino loro di l'Arsenal, et pagi ducati 60 a la Caja. Ave 8 di non sincere, 54 di no, 710 de si, et fo presa.

Fu publicato, per Zuan Batista di Adriani secretario dil Consejo di X, le do parte prese eri nel Consejo di X, come ho serito di sopra.

*Item*, una condanason fata a di 26 di questo nel dito Consejo di X, contra sier Michiel Donado di sier Zuane da San Polo, qual, hessendo in preson in l'Armamento, ha crudelissimamente biastemado. Però sia el dito sier Michiel confinà per anni 5 in la Frescazoia, dove stagi solo, et compiti, sia mandato al suo bando di Retimo, dove l'abi a star, come fu preso; et se el scampasse de dita preson, habi taja lire 500 di so' beni, se non de quelli de la Signoria, e sia rimesso in dita preson, et alora comenzi il predito tempo di anni 5 *ut in parte*.

Fu posto, per li Consieri e Cai di XL, una parte presa a di 27 nel Consejo di Pregadi, di levar la tanxa a li Pagadori a l'Armamento *ut in parte*: 4 non sinceri, 142 di no, 650 de si, fo presa.

#### *Scurtinio di Conte a Zara.*

Sier Lodovico Michiel, è provedador sora i daciai, qu. sier Polo, el qual, oltra ducati 200 prestò per sora i daciai, oferisse ducati 400 e il don. . . . . 56.64

Sier Domenego Griti, fo a la camera de Imprestedi, qu. sier Francesco, ducati 500 e il don. . . . . 58.62

† Sier Piero Marzelo, è a 'le Raxon nuove, qu. sier Zuane, el qual oltra ducati 400 prestò per le Raxon nuove et ducati 100 donoe, al presente portò contadi ducati 500 et dona il don. . . . . 86.32

#### *Podestà a Este.*

Sier Andrea Michiel di sier Francesco qu. sier Donado, ducati 250 e il don. . . . . 31.89

† Sier Lorenzo Pixani, fo podestà a Pyran, qu. sier Leonardo, ducati 200 e il don. . . . . 73.45

Sier Zuan Barbarigo, è podestà a Torzelo, qu. Serenissimo, el qual portò contadi ducati 130 e dona il don. . . . . 54.64